

**Naalakkersuisuni ilaasortat sulingiffeqaraangata inuiaqatigiinnut sullissinerup ajorteriannnginnissaa qulakkeerniarlugu apeqquteqaat naapertorlugu oqallinnissamut siunnersuut.**

(Inatsisartunut ilaasortaq, Aqqalu Jeremiassen, Atassut)

**Akissuteqaat**

(Naalakkersuisut Siulittaasuut)

Naalakkersuisut oqallisissiatut siunnersuuteqartumut qujapput. Naalakkersuisullu oqallisissiamut imatut oqaaseqaatissaqarput.

Naalakkersuisunut ilaasortap piffissami sulingiffeqarnerminut atatillugu suliaminik isumaginnissinnaanngillarnerani malittarisassat atuuttut naatsunnguupput:

- Naalakkersuisut siulittaasuata aalajangertarpaa Naalakkersuisunut ilaasortap peqqinnini pingaarutilimmilluunniit peqquteqarluni sulingikkallarnissaminik qinnuteqaataa akuerineqassanersoq, aamma
- Naalakkersuisut siulittaasuata aamma suliassaqarfiit Naalakkersuisunut ilaasortanut agguaattarpai.

Naalakkersuisunut ilaasortat, qinersinerup kingorna imaluunniit Naalakkersuisuni allanngortiterinerup kingorna Inatsisartunit ataatsimoortillugit akuerineqartarput, qinersiviullu sinneranut toqqarneqartarnerannut tamanna isiginiarneqassaaq. Inatsisartut Naalakkersuisunik akuerinnittarnerat Naalakkersuisut siulittaasuata innersuussuteqarneranit aallaaveqartarpoq, taassumalu kikkut qassillu Naalakkersuisunut ilaasortaassanersut innersuussutigisarpai.

Naalakkersuisut katitigaasarneri pillugit malittarisassat 1988-imilli maannamut annikitsumik allannguuteqartillugit atuutsinneqarput, taamani inatsisiliornermik pissaaneq Inatsisartunut kiisalu naalakkersuinissamik pissaaneq Naalakkersuisunut avillugit aalajangiisoqarmat. Ullumikkut oqartussaaffik taanna Namminersorlutik Oqartussat inatsisaanni aamma Inatsisartut Naalakkersuisullu pillugit Inatsisartut inatsisaanni aalajangerneqarsimavoq.

Naalakkersuisunik toqqaasarneq pillugu malittarisassat Naalakkersuisut Inatsisartunit tunuliaqutserneqarnerannik qulakkeerinnittarpoq, Taannalu pisarpoq Inatsisartut taasitinneqarnerisigut. Malittarisassat aamma qulakkeertarpaat Naalakkersuisut ingerlatsinerat Inatsisartunit akuliusimaffigineqanngitsumik pissasoq.

Naalakkersuisuni ilaasortat amerlassusaat inuttalersugaanerallu Inatsisartuni politikikkut sulinermi Naalakkersuisullu piunerannut tunngaviusumut ersersitsisuullunilu Naalakkersuisuni suliassa qarfinnik siunertamut naapertuuttumik agguaassinermik ersersitsisuuvoq.

Periaatsit tunngaviusut makku tunuliaqutaralugit,

- Inatsisartut Naalakkersuisunik toqqaasarput,
- Toqqaaneq qinigaaffiup sinnerani atuuttarpoq, imaanngitsoq assersuutigalugulu qinigaaffiup iluani piffissami aalajangersimasuinnarmi atuuttussaalluni
- kiisalu Naalakkersuisut ingerlatsinerisa aaqqissugaanerat Inatsisartunit akulusimaffigineqanngitsoq,

- Naalakkersuisunut ilaasortat sulinngiffeqartarnerannut malittarisassat atuuttut allanngortinnissaat siunertamut naapertuutinnitsoq Naalakkersuisut isumaqarput.

Ilaasortat ataasiakkaat sulinngiffeqarallernerisa kingunerisaanik pisarissersuutaalersartut Naalakkersuisut iluminni aaqqittarpaat, tamanna pisarpoq Naalakkersuisunut siulittaasup suliassa qarfinnik pineqartunik tigusi gallarneratigut imaluunniit suliassa qarfinnik Naalakkersuisut akornanni agguasseqqinnikkut.

Oqallinnissamat siunnersuummi tunngavilersuutigineqartoq, tassa Naalakkersuisut ilaasa sulinngikkallarneranni suliassa qarfinnik agguasseqqilluni allannguinerit Naalakkersuisut nutaat Inatsisartunit akuerineqaaqqaartarnissaannik tunngavilersuineq eqqortuunngilaq. Naalakkersuisuni allannguigallarnernut tunngasut Inatsisartut aalajangiiffigisassarinnngilaat, taamaallaat ataavartussanik allannguisoqassappat Inatsisartut akuersitineqaaqqaartussaapput. Aamma Inatsisartut Naalakkersuisullu pillugit Inatsisartut inatsisaat naapertorlugu Naalakkersuisut siulittaasuat, suliassa qarfinnik qaqugukkulluunniit allannguisinnaatitaavoq.

Naalakkersuisut ataasiakkaat qassinik suliassa qarfinnik isumaginnissinnaanerannut tunngasunik aalajangersagaqanngimmat, kiisalu Naalakkersuisunut ilaasortat ataasiakkaat sulinngikkallarneranni Naalakkersuisut iluminni aaqqiissuteqartussaanerat tunuliaqutaralugu Naalakkersuisut sulinerannut tunngaviit allanngortinnissaat Naalakkersuisunit tunngavissaqanngitsutut isumaqarfigineqarpoq.

Taamatut nalilersuinermit aamma ilaavoq Naalakkersuisunut ilaasortat ataasiakkaat peqanngikkallarneranni oqartussaaffinnik agguaassinermi misilittakkat takutimmassuk Naalakkersuisut katitigaanerat apeqqutaatinnagu Naalakkersuisut ataasiakkaat peqannginneranni oqartussaaffinnik aaqqissusseqqinnerit ilaasortanut peqanngitsunut naleqqussarneqarsinnaammata innuttaasunut nunamulluunniit sullissinermik naammaganngitsumik kinguneqartinngikkaluarlugu.

Naalakkersuisut isumaat naapertorlugu taamatut periaaseqarneq ingerlaannartariaqarpoq, tassami naalakkersuinikkut suliassanut tunngatillugu nukinnik qanoq atuisoqartigisariaqarnerisooq ilanngullugu isiginiarneqartariaqarmat.

Erseqqissanissarlugu siunertarinerullugu naggataatigut ilisimatitsissutigisinnaavara  
Naalackersuisuni ilaasortanutt tullersortissanik politikikkut toqqaasoqartalernissaanik  
Naalackersuisut siunnersuuteqassamaangimmata.. Tamanna pisariaqaranilu siunertamut  
naapertuutinngimmat.